

Här Mars di Bartolomeo
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 3. September 2015

Här President,

Sou wéi d'Chambersreglement et virgesäit, bieden ech Iech, dës parlamentaresch Fro un d'Häre Bausseminister, Justizminister, Finanzminister a Banneminister an un d'Madame Minister fir Integratioun weiderzeleeden.

Lëtzebuerg an aner europäesch Länner sinn am Abléck mat enger massiver Migratiounswell confrontéiert. Verschidde Leit wëlle sech viru Kricher a Sëcherheet bréngen, vill anerer wëllen aus réng wirtschaftleche Grënn an Europa kommen. Ee vun den Aspekter vun där Entwécklung ass eng méiglech Iwwerfuhrung vun eise Verwaltungen a Gerichter. Et ass awer wichteg, datt Lëtzebuerg weiderhi ka Leit ophuelen, déi e Recht op politeschen Asyl hunn.

Dowéinst stelle sech eng ganz Rëtsch vu praktesche a prozedurale Froen, vun deenen ech hei der e puer wollt deenen zoustännege Ministere stellen:

1. Mat wéi enger zousätzlecher finanzieller Belaaschtung fir de Staatsbudget rechent d'Regierung fir 2015 an 2016?
2. Mat wéi enger finanzieller Belaaschtung mussen d'Gemenge rechnen?
3. Wat wëll d'Regierung maachen, fir den „Asyltourismus“ (Nicolas Schmit) vu verschiddene Leit, virun allem aus de Balkanlänner, definitiv ze stoppen? Denkt d'Regierung drun, nees eng Visaflucht fir d'Balkanlänner anzeféieren?
4. Wéi wëll d'Regierung géint déi Leit virgoen, déi kuerzfristeg an illegal op Lëtzebuerg zrëckkommen, nodem si fräiwëlleg oder onfräiwëlleg no enger fir si negativer Asylprozedur rapatriéiert goufen?
5. Wëll d'Regierung weider Länner op d'Lëscht vun de „pays sûrs“ setzen? Wa jo wéi eng a wéini?

6. Wéi eng Moosnamen ginn op nationalem Plang géint Passeuren a Schleiser geholl, virun allem géint déi, déi Leit aus de Balkanlänner op Lëtzebuerg bréngen?
7. Wëll d'Regierung géint déi Leit virgoen, déi „verschwannen“, wa si sollen rapatriéiert ginn, a wëll si géint déi Leit virgoen, déi Leit, déi solle rapatriéiert ginn, bei sech doheem ophuelen, respektiv verstoppen? Denkt d'Regierung drun, der Chamber Ännerungen am Code pénal ze proposéieren?
8. Wat mecht d'Regierung, wa Kanner vu Leit, déi illegal am Land sinn a „verschwonnen“ sinn, an eise Schoulen opdauchen? Wëll si aktiv d'Eltere sichen, fir d'Gesetz oder Geriichtsuerteeler ze respektéieren an ëmzesetzen oder toleréiert si d'Emgoen vun eise Gesetzer oder vu Geriichtsuerteeler doduerch, datt sou Leit net vun der Police gesicht a rapatriéiert ginn?
9. Wëll d'Regierung d'Prozeduren am Asylrecht zäitlech oder instanzeméisseg kierzen? Wat wëll si besonnesch am Fall vu Leit maachen, déi aus sëcheren Drëttlänner kommen?
10. Wëll d'Regierung verhënneren, dat no enger, fir dee Betreffenden negativer Asylprozedur, den direkt no engem Uerteel an zweeter Instanz nach aner juristesche oder administrativ Prozeduren entaméiert, mat dem eenzegem Zil, fir esou laang wéi méiglech kënnen hei am Land ze bleiwen och wann erwisenermoosen keen Asylgrond existéiert?
11. Wëll d'Regierung d'„assistance judiciaire“ an engem Sënn reforméieren, fir datt de Mëssbrauch an déi kënschtlech Verlängerung vu Prozeduren kann efficace ageschränkt ginn? Wëll d'Regierung sech dobäi um Virbild vun aneren EU-Staaten orientéieren?
12. Wat wëll d'Regierung maachen fir ze garantéieren, dat d'Invocatioun vu „medizinesche Grënn“ fir eng Ophaltsverlängerung ze erreechen net kann zu engem neie Asilmëssbrauchsschema féieren? Wéivill där Demande gëtt et a wéi gi si kontrolléiert? Wéi huet sech Zuel vun esou Demanden an dene leschten zwee Joer entwéckelt? Wéivill Dokterer sinn disponibel fir sou Prozeduren ze begleeden an ze kontrolléieren?
13. Kann d'Regierung garantéieren, datt si zu kengem Zäitpunkt un eng obligatoresch Ennerbréngung vu Migranten oder „demandeurs d'asile“ bei Privatleit oder an eidele, private Wunnéngen denkt, elo net an och net bis zum Enn vun dëser Legislaturperiod?
14. Wéi gedenkt Lëtzebuerg ze reagéieren, wann et mat polygame Flüchtlinge konfrontéiert ass, sief et, datt déi ganz Grupp hei zëssammen ukënnt oder wa spéider, eventuell unerkannten Asylanten, all hir Fraen wéilten nokomme loossen? Ass

Lëtzebuerg bereed polygam Liewensgemeinschaften an domat méi wéi ee Conjoint unzeerkennen? Gëtt et scho sou Fäll?

15. Wat fir eng Prozeduren si virgesinn, wa Leit ouni Pabeieren hei am Land ukommen? Wat geschitt mat Leit déi gefälschte Pabeiere weisen, zum Beispill gefälschte syresch Päss?
16. Wat mecht Lëtzebuerg bei sougenannten „mineurs non accompagnés“, bei denen awer medizinesch oder aner berechtegt Zweifel existéieren, datt si iwwerhaupt nach mannerjähreg sinn?
17. Wéi eng Konsequenzen wëll d'Regierung géintiwwer dene Länner huelen, déi hir eege Staatsbierger net wëllen zrëck areese loossen, wa si hei keen Asyl kréien?
18. Wéi eng Konsequenzen wëll Lëtzebuerg géintiwwer dene Länner huelen, denen hir Ambassaden bei der Identifizéierung vun hire méigleche Staatsbierger net a vollem Empfang mat schaffen?
19. Wéivill Leit sinn am Abléck nach a Strukturen vum OLAI oder op anere Plazen hei am Land ënnerbruecht, denen hir Asylprozedur schon ofgeschloss ass an déi also müssen d'Land verloossen? Wéini ginn déi Leit rapatriéiert?

Mat déiwem Respekt,



Fernand Kartheiser
Deputéierten